

合刻薛氏醫案序

新安吳琯撰

嘗攷西漢藝文志載醫家書凡

爲經脉方書者十八家五百餘

卷皆上古醫聖之所論著金匱

石室之所秘藏由來遠矣成周



設醫官師掌醫官之政斯其所職守
歟秦火之厄所不去者醫藥卜
筮諸書故至於漢可攷而志者
如是唐初立醫學六典可稽宋
政和間詔令醫學諸生通習七
書則黃帝素問難經巢氏病源

補注本草千金方王氏脉經仲
景傷寒論三部鍼灸經龍木論
千金翼方不過數種自漢較之
所存僅僅什一耳嗣是若東垣
河間丹溪諸名家相繼代作莫
不各有論述簡冊具存學者猶

幸可據

明孝廟時乃有吳人

薛已以醫方仕至南北太醫院

院判歷事

武肅三朝號稱國

手嘗好著書自圖經素難以下

禁局諸方藥論多所校正發明

併以已嘗治驗方案前後版行

第其傳播未遠遺軼頗多醫門
之士恒竊慨焉頃余校書虎觀
偶得其書數種馳送諸名醫因
閱謂宜覆梓以博其傳亦仁者
用心之一因併購其全書得若
千種合爲一部離爲四科科以

類次凡爲經論內科者爲嬰兒
科者爲婦人科者爲外科者各
若干種卷付之剞劂易歲告成
予竊私喜覆閱再三因輒序而
論之曰醫也者先王所以重民
命拯歿昏躋之仁壽幽贊於化

育者也可易言哉蓋以斯道隱
遠玄奧難原自非聖質靈衷天
授神啓專攻世篤烏能特詣精
良輒奏全効乎故在土古則有
岐伯俞跗固天縱之矣至於中
世則有扁鵲秦越人及漢太倉

令名最著顯然倉公以陽慶取
精越人以長桑知物有由然也
雖云所授禁秘莫可旣傳而列
之圖經垂之竹帛犁然可睹後
世之書醫方脉案實自此始道
與世俱遞相祖述代有其人錄

在史傳方志指可僂數間若仲
景之論傷寒東垣之發內傷河
間之表熱病丹溪之明雜症其
於經論羽翼爲多可謂具體者
矣薛氏起當明盛久事禁中
因得徧窺奧典通習諸科遂能

援經精義隨病卽功立一家言
以明斯道視於諸子其新安之
集大成歟業是科者誠能溯此
尚論軒岐斯亦登泰山者之先
梁父乎雖然書不盡言言不盡
意如必因書以求言則有出於

言表者不必盡於書如必因言
以求意則有出於意表者不必
盡於言雖薛氏有不能自知者
余則烏能知之在善學者能自
得之耳善夫郭玉有言曰醫之
爲言意也毫芒之際可得而解

不可得而言於書乎何有易曰
神而明之存乎其人此之謂也

新刻十四經絡發揮序

十四經絡發揮者發揮十四經絡也經絡在人身手
三陰三陽足三陰三陽凡十有二而云十四者併任
督二脈言也任督二脈何以併言任脈直行於腹督
脈直行於背爲腹背中行諸穴所系也手太陰肺經
左右各十一穴足太陰脾經左右各二十七穴手陽
明大腸經左右各二十穴足陽明胃經左右各四十
五穴手少陰心經左右各九穴足少陰腎經左右各
二十七穴手太陽小腸經左右各十九穴是太陽膀胱
經左右各六十三穴手厥陰心包經左右各九穴

足厥陰肝經左右各十三穴手少陽三焦經左右各
四十六穴足少陽膽經左右各四十三穴兼以任脈
中行二十四穴督脈中行二十八穴而人身周矣醫
者明此可以鍼可以灸可以湯液投之所向無不取
驗後世醫道不明古先聖王救世之術多廢不講鍼
灸湯液之法或岐或二或參或三其又最下則鍼行
者百一灸行者什二湯液行者什九而千萬裡何多
寡之相懸耶或者以鍼誤立效灸次之而湯液猶可
稍緩乎是故業彼者多業此者寡也噫果若是亦淺
矣哉其用心也夫醫之治病猶人之治水水行於天

地猶血氣行於人身也溝渠畎澮河海川瀆皆其流
注交際之處或壅焉或塞焉或溢焉皆足以害治而
成病苟不明其嚮道而欲治之其不至於泛濫妄行
者否醫之治病一迎一隨一補一瀉一汗一下一
宣一導凡所以取其和平者亦若是耳而可置經絡
於不講乎滑伯仁氏有憂之故爲之圖爲之註爲之
歌以發揮之周悉詳盡曲暢旁通後之醫者可被卷
而得焉伯仁氏之用心亦深矣哉後伯仁氏而興者
有薛良武氏焉良武氏潛心講究其所自得亦已多
矣乃復校正是書而刊諸梓欲以廣其傳焉推是心

也卽伯仁氏之心也良武名鎧爲吳之長洲人有子
曰已者今以醫判南京太醫事尤以外科名而外科
者特具一也君子謂其能振家業云

嘉靖戊子冬閏十月望日前進士姑蘇西閭盛應陽
斯顯書于金陵官舍

薛氏醫按目錄

新安吳瑭輯

白下朱廷樞校

內科

十四經發揮 三卷

難經本義 二卷

本草發揮 四卷

平治會萃 三卷